

SISWATI LULWIMI LWEKUCALA LWEKWENGETA: LIPHEPHA I
SISWATI FIRST ADDITIONAL LANGUAGE: PAPER I

Sikhatsi: 2½ Emahora

Emamaki: 100

TICONDZISO

1. Leliphepha linetigaba letine nemakhasi la-14.
 2. Landzela ticondziso taleso naleso sigaba.

SIGABA A: SIVISISO
SIGABA B: SIFINYETO
SIGABA C: TINKONDLO
SIGABA D: TAKHI NETIMISO TEKUSETJENTISWA KWELULWIMI
 3. Phendvula yonkhe imibuto ngeSiswati lesemukelekile.
 4. Cala leso naleso sigaba ekhasini lelisha uphindze udvwebele ekugcineni kwaleso naleso sigaba.
 5. Shiya umugca emkhatsini wetimphendvulo takho.
 6. Caphela sipelingi (lupelomagama) nendlela lekwakhiwa ngayo imisho.
-

SIGABA A SIVISISO

UMBUTO 1

1.1 Fundza letheksthi bese uphendvula imibuto lelandzelako.

ITHEKSTHI A

Libhokisi Lemngcwabo

'Sesingahamba Phinda?'

'Usho kwekutsi sekuphelile yini Phindile?'

Bekubuta liphahla lemfana kudzadzewabo. Lamaphahla sekaneminyaka lengemashumi lamabili nemphama. Solo atalwa kwate kwafa nebatali bawo aphila kanye. Nobe kukuphi awomabili. Batali bawo bafa engotini yekuwa kwesitimela, ngebhadi bafa bobabili. Ngaleso sikhatsi Phinda naPhindile bebanelishumi leminyaka neminyaka lemine. Esikolweni amange bahambe lokuyaphi ngobe baphelela encwadzini yemfica. Sizatfu kwaba kweswela batali nobe lesinye sihlobo sekubachuba.

Phinda naPhindile bacala kuphila imphilo lematima kute batfole lokuya etfunjini. Amange bahlukane bacondza bobabili efemini lekhicita liphepha eNgodwane. Basebenta iminyaka lemitsatfu bacongelela imali. Phinda bekasebenta kuyo ifemi kantsi dzadzewabo yena angumabhalane khona lapho efemini. Ngemuva kweminyaka lemitsatfu bashiya phansi kusebenta.

Yonkhe imali labebayisebenta bayonga, batsenga ngayo imoti leyayimnyama, iyindze. Luhlobo nalu lolusetjentiswa ngulaba benhlangano yekungcwaba. Lamaphahla ayisebentisa imoti kute atfole lokuya etfunjini bakwati kuphila. Kwekucala Phinda bekaye aphume angene emgwacweni amemete labaya etindzaweni letehlukene. Labakhwelako abakhokhise imali, nguleyo mali labatiphilisa ngayo nadzadzewabo. Ngaletinye tinsuku kube lukhuni kubatfole bantfu. Linyenti belitsi nalibuka lemoti litsi, yemasontsane lingafuni kugibela. Ngalesinye sikhatsi bekabatfole. Bekaba nenhlanhla natfole labamatiko bagibele.

Lesimo samletsela inkinga Phinda badzimate babonisana naPhindile kutsi kungabanjani bayintjintje lemoti. Kwabatsatsa sikhatsi lesidze kutfole licebo lekuyintjintja. Konje Phinda wabona kutsi kungete kwalunga nabangenta lolunye luhlobo lwemsebenti ngobe phela bekabona lemali labayitfolako.

Wesuka lapho Phinda watsatsa Phindile bashona egalaji letimoti. Egalaji befika bakhetsa imoti lemnyama nayo lengafani cobo nalena yakucala nayo itsi ayiye kuto leti temngcwabo kodvwa inconywana, ayesabeki njengalena yakucala.

Phinda ubuta kutsi sekungahanjwa nje ngobe phela sebantjintje lunyawo emphilweni yabo. Batinikele ngetinhlitiyo tabo tonkhe kulomsebenti kutsi nobe ngabe yini lebavelelako ngeke batisole.

Ekucaleni kwayo kuyisebentisa lemoti beyicashwa ikakhulukati emingcwabeni itfwale libhokisi. Nakungulesimo bekangahlali entsanyeni Phinda ebantfwini, bekamane atsi halamuti kute atsenge emafutsa emoti. Akuphelanga lapho bewuchubeka umsebenti wakhe, wandlondlobala ngekutsi ilandze tidvumbu kakhulukati umuntfu nafele khashane.

Emotweni bekuvele kulayishwe libhokisi labo lebebalitsengile ingene indlela iye lapho iyolandza khona sidvumbu.

Lamuhla lemoti icashwe nguMtsetfwa kutsi iyolandza umuntfu ngobe ngakusasa kumele afihlwe. Kwaba njalo yaphindze yabuya.

Ngaleso sikhatsi bese banato ngisho tingubo temngcwabo sebaphelele ngako konkhe. NgaleSihlanu kuKholwane yaphuma imoti lendze lemnyama, esondvweni nguye Phinda kantsi eceleni kwakhe ngudzadzewabo Phindile. Phindile ugcoke letimnyama tsu, nabani uyatibonela kutsi uselusizini. Emehlo avuvukile ngenca yesihlobo sakhe lesitawutfwala umhlabatsi ngesifuba.

Yesuka eSpearville icondze esibhedlela eBarberton kute icondze eMiddelburg. Kutsite nabangena ekhatsi wacala kukhihlita Phindile. Liduku lahlala emehlweni mlibe. Kantsi isuka lapho nje isuka emnyeleni weleMaswati kusebusuku.

Ekhatsi emotweni Phinda uhleti esondvweni, libhokisi ligocotelwe ngaletimnyama. Empeleni Phindile bekakhala nayisondzela ebantfwini imoti. Bekutsi ingengca atibindzele aticocele.

Wayigwedla Phinda Malengane yashushumba netiganga itenyusa icondze etulu nato. Itsite nayifika etulu yawudvonsa umoya yahamba mlibe ikhetsa tindlela, bekuya ngesifiso semgwedli phela. Ngetulu emotweni kubhanyata lilambu lelibonisa ingoti nekujaka. Itsite nayitsi lundvu ifuna kutsatsa umenyukelo lobheke eNgodwana, yatitsela emaphoyiseni labekavimbe umgwaco. Lwabatsi bi luvalo kodvwa baticinisa. Emaphoyisa amange abahluphe abatjela kutsi bengce. Wayidvonsa Phinda kwakhala lisondvo kwabantima sikontiyela.

"Uyabona Msitsini?"

"Ngibonani Mnguni?"

"Lemoti inelibhokisi lemngcwabo."

"Yebo kepha kunani?"

"Usho kwekutsi onkhe lamalanga yona nasiyibona isuke iyongcwaba?"

"Konakelephi pho?"

"Ngendlela lengibona ngayo mine, kushengatsi kuyonakala."

"Ngesimo nangesento Msitsini. Ubona njani asiyilandzele lemoti, ayikabi khashane. Asiyilandzele siyihhohhe sibone kutsi ngabe sidvumbu sibili yini lesi labasetfwele."

Yesuka lapho imoti yabakasidlodlo yatsela emafutsa yabe ibalandzela. Akubanga sikhatsi lesinganani, bayitfola yaboPhinda.

[Akwehli Ngemphimbo Munye: 52–53]

- 1.1.1 Ngubani lomdzala kuPhinda naPhindile? (1)
- 1.1.2 Bhala iminyaka labebanayo nakushona batali babo, ngetinombolo, (ngemadijithi). (1)
- 1.1.3 Bebabangelwa yini kutsi bangafuni kuntjintja umsebenti? (1)
- 1.1.4 Njengobe batali babo bashona babancane nje, yaphazamiseka njani imphilo yabo? (1)
- 1.1.5 Ngubani labebanika imali yekudla emva kwekushona kwebatali babo? (2)
- 1.1.6 Yini lebeyibangela kutsi bantfu besabe kugibela imoti yalamaphahla? (2)
- 1.1.7 Bhala kubili lokukhomba kutsi Phindile abeselusizini futsi afelwe sihlobo sakhe. (2)
- 1.1.8 Khetsa imphendvulo lecinisile kuleti letilandzelako:
Abangelwa yini emaphoyisa kutsi alandzele imoti yaboPhindile?
- A Asoliswa kuchucha nekukhala kwaPhindile nabebamisa.
B Asoliswa ngulemoti lehlala njalo inelibhokisi lemngcwabo.
C Asoliswa litubane boPhinda naPhindile lebebahamba ngalo.
D Asoliswa ngulelilambu lelibovu etukwemoti yabo. (2)
- 1.1.9 Chaza lenkhulumo letsi, "Phinda abengabahlali entsanyeni bantfu nakababhadalisa emotini yakhe"? (2)
- 1.1.10 Phawula ngesento salamaphahla sekusebentisa libhokisi linye kuyolandza tidvumbu, ubhekise kulesimo salamuhla setemphilo. (2)
- 1.1.11 Yini leyenta kutsi emaphoyisa angabahluphi kodvwa abengcise nje? (2)
- 1.1.12 Bhala tibonelo letimbili teluhlobo lwetimoti letinalelilambu lelibovu njengaleli lebelikhanyiswe boPhindile etukwemoti yabo. (2)

[20]

1.2 Fundza lesibonwa bese uphendvula imibuto lelandzelako.

ITHEKSTHI B SIBONWA



- 1.2.1 Sinjani simo selitulu kulesibonwa? (1)
- 1.2.2 Yini lengaka lejabulisa labantfu kulesibonwa? (1)
- 1.2.3 Bhala tingoti letimbilili letingavelela labantfu labakulesibonwa. (2)
- 1.2.4 Chaza kutsi lamanti lakulesibonwa awutfufukisa kanjani umnotfo welve. (2)
- 1.2.5 Labangakwati kuhlamba bangaphepha kanjani nangabe nabo bafuna kuhlamba? (2)
- 1.2.6 Labantfu labakulesibonwa baphephe nganani kulesifo seCovid-19? Chaza. (2)

[10]

30 emamaki

SIGABA B

SIFINYETO

UMBUTO 2

Fundza lethekesthi lelandzelako bese uyayifinyeta **ngemagama akho langengci kula-60** ubhekise **kuloko lobekwentiwa boSipho naSweetness, kukhombisa lutsandvo labenalo Sipho kuSweetness**. Sifinyeto sakho asibe ngendlela **yemaphuzu lasihlanu**.

CAPHELA

- Lulwimi lwakho lungabi nemaphutsa kute ungalahlekelwa ngemamaki elulwimi.
- Sebentisa timphawu tekubhala nekufundza.
- Bhala linani lemagama lowasebentisile ekugcineni kwesifinyeto sakho.

ITHEKSTHI C

LUTSANDVO LABENALO SIPHO KUSWEETNESS

Tingaba buhlungu tonkhe tintfo emhlabeni, kepha hhayi njengekutsandza umuntfu abe yena angakutsandzi. Uyati nje bese kusikhatsi lesidze solo ngifuna kumkhulumisa Sweetness Dlamini. Ekhaya kubo bekwakhelene kwabukana nje nakitsi. Tintfo letinyenti kulamakhaya besibolekana. Lemindeneni beyivana kakhulu.

Sweetness lona abemncane kancane lapha kimi. Nangifundza libanga lesihlanu yena abefundza libanga lesine. Futsi besifundza esikolweni sinye naye. Saba bangani kusukela ebuncaneni betfu. Sikhula vele sidlala ndzawonye. Ngalamanye emalanga mine bengidlala ekhaboSweetness ngite ngilale khona. Sweetness naye ngalokunjalo, ngalamanye emalanga abedlala ate alale khona ekhaya kitsi.

Nasiya esikolweni besimelana singashiyani. Nobe sesiphuma besimelana. Nakuphume mine kucala ekuseni, bengimmela. Naye nangabe aphume kucala ekhaya kubo, bekangimela. Nasekuphumeni kwesikolo bekuba ngiko loko. Bekuba yinkinga ekuphumeni kwesikolo nangabe bafundzisi basisalisile kute sicedzise letinye tifundvo. Sifundvo lebesivamise kutsi sisisalele, sisifundze ekuphumeni kwesikolo, sifundvo seTibalo. Linyenti lebafundzi belingasikhoni kahle lesifundvo. Pho besifundziswa ngubani-ke, Thishela Sukati lomnyama, amhlophe ngematinyo. Lulaka beluvutsa bhe.

Mine ngimi lebengitfwalela Sweetness sikhwama semabhuku, nakuphuma sikolo. Bengimtfwalela tincwadzi yena ahambe lapha eceleni kwami kubuke wonkhe umuntfu. Ngiyawakhumbula futsi nalamakha Sweetness labevamise kuwafaka emakhwapheni. Ekhaya kubo bebavamise kumtsengela wona. Bengijatjuliswa nje ngiko loko kutsi Sweetness uhamba nami lapha eceleni kwami. Ngijatjuliswa kubona bantfu bangibuka nangihamba naye, nami ngitive ngimkhulu lapha eceleni kwakhe. Bengihamba ngite ngikhukhumuke, ngite ngigcwale umgwaco lapha eceleni kwakhe.

Phela lapho nami bese ngikhulakhulile, ngifundza libanga lesiphohlongo, besekukhona lowo mcondvo wekutsi nami ngisomasome nanobe bengihlushwa ngiko nje kumesaba Sweetness.

Njalo nje nakuphuma sikolo tsine naSweetness sitawuhamba kancane le emuva. Besihamba, sihambe sime sibukane ekhatsi emehlweni, sicoce, sihleke kube mnandzi, Sweetness ate aphume tinyembeti. Ngitsi nangitsi ngiyamesula letinyembeti Sweetness, ashaye sandla sami siyowa le kahheli, umuve asatsi, "Yini wena Sipho? Nginetandla tami mine, ngiyakwati kutesula. Ngitatesula ngekwami."

[Tayitolo Nalamuhla: 59–60]

SIGABA C TINKONDLO

UMBUTO 3 INKONDLO LENGAKAFUNDVWA EKLASINI

CAPHELA: Kuphokelele kutsi wonkhe lohlolwako awuphendvule lombuto.

Fundza lenkondlo bese uphendvula imibuto lelandzelako.

MFUNDVO – E. S. JELE

- 1 Wena sibane selive
- 2 Lesinekukhanya lokwehlukile.
- 3 Lapho kuhlakanipha konkhe kutifihle khona.
- 4 Ngitsi hlala njalo mfundvo,
- 5 Konkhe kuyefika kubuye kwendlule futsi.
- 6 Kepha wena uhlal' umusha.
- 7 Kantsi wena mfundvo uyini
- 8 Ngobe konkhe kwakho kuhlala kukusha?
- 9 Khanyisa kuyo indlu lemnyama,
- 10 Wena sinkhwa lesingapheli.
- 11 Wena mfula logobhota busika nehlobo
- 12 Banatse labo labakomele
- 13 Ngobe wena ungakhetsi bala lemuntfu,
- 14 Livila lon' alisondzeli kuwe.
- 15 Labakhutsele bayavuna
- 16 Titselo takho letinhle,
- 17 Bakubabate bangayekeli,
- 18 Imisebenti yakho lemihle,
- 19 Lembiwa emtfonjeni lojulile.
- 20 Umuhle mfundvo!
- 21 Ulihawu letihlakaniphi,
- 22 Uligugu lelingabuni,
- 23 Utsandvwa ngulabakhutsele,
- 24 Wena mfundvo ndzini.

[Liphimbo Lombongi: 75]

- 3.1 Bhala emagama lakha luchumano endzimeni 3. (1)
- 3.2 Umugca wesitsatfu ucuketse hlobo luni lwesinongo? (1)
- 3.3 Bhala umusho losendzimeni 5 loveta sobala ingcikitsi yalenkondlo. (1)
- 3.4 Nguyiphi lendlu lemnyama leshiwo ngusonkondlo? (1)

- 3.5 Bobani labo labashiwo ngusonkondlo emgceni 15? (2)
- 3.6 Bhala umusho lomele umtapo wetincwadzi endzimeni 4. (2)
- 3.7 Endzimeni yekugcina bhala imigca lemibili lenemvumelwanosicalo leyakhiwa
tinhlavu letimbili. Dwebela lemvumelwano. (2)

[10]

UMBUTO 4 TINKONDLO LETIFUNDVWE EKLASINI

EMAKHANGALA – C. TSABEDZE (UMHLELI)

Lombuto unemibuto lemibili, (4.1 na 4.2) khetsa munye uphendvule ngawo.

4.1 Fundza lenkondlo bese uphendvula imibuto lelandzelako.

SELA NDZINI – J. J. TFWALA

1 Kadze babalisa ngawe,
2 Bakhuluma edvute nakhashane,
3 **Bakhuluma** bangacedzi **boKhulumile**,
4 Bats' ulisela lemasela,
5 Lamuhl' angiwutsi **vu** ngawe.

6 Hhayi, sela ndzini!
7 Uyicedzil' inkhani kimi
8 Ubucedzile bungcamngeshe kimi,
9 Uwacedzile emandla kimi
10 Wena sela uyimphicabadzala.

11 Mshiya lowa bakhala ngawe,
12 Nganeno bakhala ngawe,
13 Utsats' imiphefumulo ungadzinwa,
14 Lenelicala nalengenacal' uyayitsatsa
15 Hhayi, sela usidli!

16 Utsatsa bantfwana,
17 Utsatse labadzala,
18 Utsatsa tichaga,
19 Utsatse tingcumba,
20 Utsatse labahle
21 Utsatse lababi sela!

22 Utsats' emakholwa,
23 Utsats' emahedeni,
24 Utsatsa tikhulu telive,
25 Utsatse bafokatana,
26 Wonkhe lodaliwe
27 Usitsa nawe sela!

4.1.1 Bobani labo labashiwo ngusonkondlo kutsi bakhuluma edvute nakhashane, bangacedzi? (1)

4.1.2 Sonkondlo ukubita ngekutsini kukhuluma ungacedzi? (1)

4.1.3 Bhala imigca leyakha luchumano endzimeni 3. (1)

- 4.1.4 Laba labashiwo endzimeni yekugcina lelisela libatsatsa libayisephi? (1)
- 4.1.5 Luchaza kutsini loluphawu "!", kulemigca lesenkondlweni? (2)
- 4.1.6 Ikhuluma ngani lenkondlo? Bhala umugca munye losendzimeni yesitsatfu lofakazela imphendvulo yakho. (2)
- 4.1.7 Sonkondlo usebentise sifanisongco kuchaza lelisela. Bhala umugca locuketse lesifanisongco. (2)
- 4.1.8 Bantfwana bakhunjutwani endzimeni 4? Chaza. (2)
- 4.1.9 Shano kutsi sonkondlo ucondzeni ngalamagama latsi "imphicabadzala" emgcani we-10. (2)
- 4.1.10 Ngabe sonkondlo usho kutsini natsi, "Kutsatsa tinyatselo letifanele"? (2)
- 4.1.11 Ngabe ikhona yini indlela lengentiwa tetsamelilwati talenkondlo kubalekela lelisela? Chaza. (2)
- 4.1.12 Sifundvo sini lesitfolakala kulenkondlo? Nika liphuzu linye. (2)

[20]

NOBE

4.2 Fundza lenkondlo bese uphendvula imibuto lelandzelako:

KHULA PHELA – M. S. MAGAGULA

- 1 Man' echibini njengatsekwane,
2 Sulusuluk' utibuk' utibuke ndzawonkhe,
3 Emabel' agcwele sifub' ayaguca,
4 Agucela luswane, selungakwenela,
5 Wen' usalibele kukhasel' etiko,
6 Wetsembe kwekhutwa njengemntfwana,
7 Kants' uyatiyeng' umdzal' utativela!
- 8 Khula phela! Umdzal' asutibuke;
9 Livi liyabhobhodla, silevu sifomile,
10 Sifomel' **umuti netawo** kufomisana,
11 Wen' usalibele kudlal' emadlwane,
12 Utiyenga **ngelite** njengesinkhitsu,
13 Utifak' engcakin' ukhalele kusitwa,
14 Yelele! Sewumdzal' utativela!

- 4.2.1 Lenyoni labatsi ngutsekwane itfolakala kuphi? (1)
- 4.2.2 Uyikhetse kahle yini lenyoni kuyifanisa nekutibuka emacala onkhe? (1)
- 4.2.3 Usebentise siphi sento sonkondlo nasho kutsi utatibonela? (1)

- 4.2.4 Sinongo sini senkhulamo lesisetjentiswe ngusonkondlo emgceni 6? (1)
- 4.2.5 Bhala lamagama ladvwetjelwe ngeSiswati lesilula.
Wen' usalibele kukhasel' etiko. (2)
- 4.2.6 Usho kutsini sonkondlo natsi "luswane selungakwenela"? (2)
- 4.2.7 Usho kutsini sonkondlo natsi, "Khula Phela!"? (2)
- 4.2.8 Sonkondlo ubhekise tiyalo takhe kulabasikati nalabadvuna. Nika sibonelo semigca lefakazela loko.
- (a) Kulabasikati (1)
- (b) Kulabadvuna (1)
- 4.2.9 Ushoni sonkondlo emgceni we-10 ngalamagama ladvwetjelwe enkondlweni? (2)
- 4.2.10 Uchazani sonkondlo ngaleligama leladvwetjelwe emgceni we-12? (2)
- 4.2.11 Bhala umugca losendzimeni yekugcina locuketse kubabata kwasonkondlo. (2)
- 4.2.12 Bhala emaphuzu lamabili ngesakhiwo setindzima talenkondlo. (2)

[20]

30 emamaki

SIGABA D TAKHI NETIMISO TEKUSETJENTISWA KWELULWIMI

UMBUTO 5

5.1 Fundza lethekthi bese uphendvula imibuto lelandzelako.

ITHEKSTHI D

KUHLE KETFU!

"Usho ngani-ke LaMamba?" lomdzala uyatibutisa ubulawa yinjabulo kute kunyakata netihlatsi. "Ngisho ngobe lomntfwana waShongwe ukhulumisa kwemuntfu lopholile, aketfwali emehlo njengemntfwana lophaphako. Uyawumane atone nje nangabe angagucuka abe ngulokunye."

"Ngiyakubona nami loko. Ngimbona sengatsi ubindzile." Kwesekela LaFakudze.

"Hawu! Kona buhle lobu bendvodzakati yaShongwe, loku nguphuma langa sikotse? Uyachachamba muhle abindzile yehheni! Maye uyajabula impela wena LaFakudze, akusenganani kutsi sewutawutfole makoti lotase akuphumute kukhana nemanti, kuphekelana nebantfwana kudla. Lokutsi umdzala ubeloku utfota tinkhuni."

"Ngingakuhlubi lulwimi. Uyabona loko kuyawutentekela kona, ngeke wetsembe kutsi vele kuyakuba njalo. Kusekutseni kuyavuma yini nekutsi makoti ukhuliswe njani. Bomakoti balamuhla ababanaki bomaketala," sekulandvula LaFakudze.

"Loko kuliciniso leliphelile ngobe lomunye makoti utsi nje efika abe lifu, angafuni sampela kuvana neninata nabosikoni bakhe. Uyesuka lapho ufuna kuphuma likhaya lakhe, angakotiti akhiphe umfana ekhaya kubo, asengakabi ngisho nemfuyo yodvwa le, khona atewutentela lakutsandzako ngaye."

"Yelele! Tsine singaka nje asiyati lentfo lenjalo. Solo saphuma emitini yabobabe, sayibamba imitsetfo yabo labasinika yona. Kubhidlita umuti webantfu akusiyo inhlanhla. Ungaphindze wetsembe kutsi kungaba khona lokungase kukulungele ungumuntfu.

Nalabadvuna ngale kwensika bahlalisekile bakhulumana netindzaba temmango. Kutse mphu umsindvo. Bona-ke bayakhuluma baphakamisa emavi, kuyevakala konkhe labakushoko. Kusha luhleko, uyabona nawe kutsi bajabulile impela. Phela bobabe bahlala bajabulile kunabomake. Phela bekulilanga labo lekuphumula ngalelo langa. Ngelilanga lesitsatfu bavalelisa kulabadzala.

[Lolwalu ... la 55]

5.1.1 Bhala ligama lelingumcondvofana waleli lelidvwetjelwe kulomusho lolandzelako:

Lentfombatana ibukeka ibindzile. (1)

5.1.2 Hlobo luni lwelibito leli lelidvwetjele emgceni wekucala? (1)

- 5.1.3 Kuletheksthi lengenhla khetsa luhlobo lwesinongo senkhulumo lesingiso kubakaki.
- (a) Ngimbona sengatsi ubindzile. (Sifaniso; Kumuntfutisa; Sifanisongco.) (1)
- (b) Lomakoti nguphuma langa sikotse. (Sifaniso; Kumuntfutisa; Sifanisongco.) (1)
- 5.1.4 Kuletheksthi lengenhla bhala imisho lecuketse letinhlobo letilandzelako tetinkhulumo.
- (a) Inkhulumo letsatsa luhlangotsi. (Indzima 7) (1)
- (b) Inkhulumo leyimfundzisolite. (Indzima 4) (1)
- 5.1.5 Shano kutsi lamagama ladvwetjelwe ayini lapha kulomusho lolandzelako:
- Tsine** sayibamba **imitsetfo** yabobabe. (2)
- 5.1.6 Kuletheksthi bhala sibonelo semisho lecuketse letimphambosi letilandzelako.
- Ubuke kubakaki kutsi leyo misho itfolakala kuyiphi indzima etheksthini.
- (a) Imphambosi **yekwentana** lekhomba kwenta lokutsite sikhatsi lesidze. (Endzimeni ye-3) (1)
- (b) Imphambosi **yekwentisa** lekhomba kulingisa lokutsite. (Endzimeni ye-1) (1)
- 5.1.7 Khetsa imphendvulo lechaza lomusho lolandzelako.
- Ngingakuhlubi lulwimi.
- A Ngingakuphazamisi usakhuluma.
B Ngingakulimati lulimi usakhuluma.
C Ngingakwenti utilume lulimi usakhuluma.
D Ngingakuphambanisi lulimi usakhuluma. (1)
- 5.1.8 Shano kutsi hlobo luni lwesibaluli lolu loludvwetjelwe kulomusho longentasi.
- Utatentela **lakutsandzako** ngaye. (1)
- 5.1.9 Bhala lomusho lolandzelako ube yinkhulumombiko.
- LaFakudze utsi, "Ngiyakubona nami loko." (2)

5.1.10 Bhala lomusho lolandzelako ngendlela lephikako.

Loko kuliciniso leliphelele. (2)

5.1.11 Bhala tibabato letimbili letikuletheksthi lengenhla. (2)

5.1.12 Hlanganisa lemisho lemibili ibe ngumusho munye.

Labadvuna baphakamisa emavi. Labadvuna behlisa emavi. (2)
[20]

5.2 5.2.1 Shano kutsi letaga tishiwo nakwente njani.

(a) Salakutjelwa sibona ngemopho. (1)

(b) Intsandzane lenhle ngumakhotfwa ngunina. (1)

5.2.2 Bhala bomahambisana labasho loku lokudvwetjelwe.

(a) Labantfu bayatsandzana. (1)

(b) BoLaDlamini naLaFakudze batitsa letinkhulu. (1)

5.2.3 Bhala tisho letinaletinchazelo letilandzelako.

(a) Kuhlebela umuntfu lokutsite. (1)

(b) Kungalali busuku bonkhe kusukela ngayitolo. (1)

5.2.4 Hlobo luni lwenkhulumo lolu lolulandzelako?

(a) Bonkhe bantfwana belibanga lelishumi batawuya enyuvesi. (1)

(b) Vele bomake batsatsa sikhatsi lesidze nabatilungiselela kuhamba. (1)

5.2.5 Akha imisho leSiswati lesingenamaphutsa ngemabitomfutselo alelo nalelo libito kulawa lalandzelako.

(a) Emafutsa. (1)

(b) Bantfu. (1)
[10]

30 emamaki

Samba: 100 emamaki